

ՏԱՐՈՆԻ ՀՈԳԵՎՈՐ ԱՌԱՋՆՈՐԴԸ

Է.Ա. ԿՈՍՏԱՆԴՅԱՆ

Սկրտիչ Խրիմյանի՝ Վասպուրականում ծավալած հայրենամամեր գործունեության համբավը հասել էր Տարոն, Մուշ: Տարոնահայությունը իր ցանկությունը հանրագրերի ձևով արտահայտեց Կ.Պոլսի Ազգային ժողովի առաջ: Ազգային առժամանակյա խառն ժողովը, ամսալով տարոնահայության խրնդրանքին, Խրիմյանին նշանակեց Տարոնի հոգևոր առաջնորդ և Սր.Կարապետ վանքի վանահայր¹, նրա վրա թողնելով Վարազա վանահայրությունը ևս: Ստանալով ժամանակի պատրիարքական տեղապահ Ստեփան արքեպիսկոպոսի կոնդակը և Բ.Դռան ֆերմանը, Խրիմյանը Գ.Սրվանձտյանցի ուղեկցությամբ մեկնեց Տարոն՝ իր հետ վերցնելով Վարազա փայտյա տպագրական մեքենան: Նրա ժամանակակից Երեմիա Տեկանցը վկայում է: «Ի 1862 ի օգոստոս ամսոյ 30 հասանէ ի Մուշն ի վանս սուրբ Կարապետի վարեալ զպաշտոնն իւր»²: 1862թ. աշնանը Խրիմյանն արդեն անցել էր իր պարտականությունների կատարմանը:

Սր.Կարապետի վանքը ուներ մեծ հարստություն՝ գյուղեր, արոտավայրեր, շարժական և անշարժ գույք³: Այդ հարստությունը մախվում էր տեղական հոգևոր և աշխարհիկ վերնախավի՝ միաբանության պորտաբույծ վարդապետների, վանահոր, նրա փոխանորդի, մերձակա գյուղերի ռեխների, աղաների և համփաների կողմից: Վանքի հարստությունից իրենց բաժինն ունեին նաև քուրդ շեյխերն ու բեկերը: Վանքի միաբանությունը փշերով ընդունեց Խրիմյանին: Նորընտիր վանահոր առաջին գործը եղավ տնտեսական խորհրդի կազմակերպումը, խիստ հսկողություն սահմանելը վանքի հասույթների վրա, դրանք ազգօգուտ նպատակներով օգտագործելու համար: Կազմվեց վանքի բարենորոգումների ծրագիր, իսկ Մուշում, ժողովրդի հավանությամբ, հաստատվեց 12 անձից բաղկացած Ազգային ժողով, որի նախագահ և առաջնորդական փոխանորդ նշանակվեց Մամբրե վարդապետ Մամիկոնյանը, որը Խրիմյանին ընդդիմադիր խմբից էր: Դիվանագիտական այդ քայլով Խրիմյանը ցանկանում էր հաշտության ձեռք մեկնել իր ընդդիմադիրներին՝ միասնական ուժերով հարստահարություններին դիմակայելու համար: Մակայն այդ նրան չհաջողվեց: Իզուր չէր Երեմիա Տեկանցը գրում. «Մամբրե վարդապետ Մամիկոնեան դարանամուտ լեալ նմա, հարուցաներ ներքին և արտաքին խոչ և խութ, քանզի ինքն իսկ ցանկայր ժառանգել այն պաշտոն առաջնորդական և վանահայրական»⁴: Միաբանության և նորեկ վանահոր միջև ծայր առավ երկարատև մի պայքար, որի հիմքը տնտեսական գործոնն էր⁵: Դա սովորական աթոռակռիվ չէր, այլ պայքար երկու տարբեր սոցիալական խմբավորումների

¹ Վանքը հռչակվել էր դեռևս վաղ միջնադարից, այստեղ վանահայր էր եղել հայտնի փիլիսոփա Ջենոք Գլակը: Այդ պատճառով այն հաճախ կոչվում էր Գլակա վանք: Աշխարհագրական դիրքի պատճառով (վանքը գտնվում էր Ինճակնյան լեռների վրա) այն կոչվում էր նաև Ինճակնյան վանք: Սուրբ Կարապետ անվանումը վանքը ստացել էր ավելի ուշ, միջնադարում:

² Մատենադարան, ձեռագիր 4177, էջ 44:

³ ԳԱԹ, Հ.Առաքելյանի ֆ., գ. 182, էջ 11, Մեղ ու, 1863, №197:

⁴ Մատենադարան, ձեռագիր 4177, էջ 44:

⁵ Նույն տեղում, էջ 72:

միջև: Ժողովրդի ծոցից դուրս եկած վարդապետը պայքարում էր նրա շահերի համար, ընդդեմ սեփական և այլազգի ցեղերի: Կառավարական պաշտոնյաները դաշն են կնքում ընդդիմադիր խմբակցության միաբանների հետ՝ Խրիմյանին հեռացնելու կամ մեջտեղից վերացնելու համար: Միաբանության անդամ վարդապետները Խրիմյանին ներկայացրին վանքի տնտեսության հաշիվը այն տեսքով, որ այդ հարուստ վանքն ունի 100.000 դուրուշ պարտք, և այն ծանրանալու է նոր վանահոր վրա: Դրանով ակնկալվում էր վախեցնել Խրիմյանին և իր կողմնակիցների հետ միասին փախցնել վանքից: Սակայն այդ միջոցն ապարդյուն անցավ: Խրիմյանը ծավալեց եռանդուն գործունեություն: Նա գտնում էր, որ անհրաժեշտ է բացել ժողովրդի աչքերը, սրափեցնել նրան «մահանման քնից», ազգային ինքնագիտակցության զգացումը սերմանել նրան մեջ: Այդ նպատակն իրականացնելու միջոցներն էին դպրոցն ու մամուլը: Սր.Կարապետի վանքում բացվում է նոր «Ժառանգավորաց» վարժարան, որի տնօրենն ու գլխավոր ուսուցիչը Խրիմյանի հրահանգով դառնում է Գարեգին Մրվանձտյանցը: Այս «Ժառանգավորացը» Վարագա վարժարանի հետ համեմատած, ուներ առավել աշխարհիկ քեքում, ուսուցիչների գերակշռող մասը աշխարհականներ էին, դասավանդվող առարկաները՝ առավելապես աշխարհիկ գիտելիքներ:

1863 թ. ապրիլից վանքում սկսվում է հրատարակվել «Լրատար Արծվիկ Տարոնո» երկշաբաթաթերթը, որի տիտղոսաթերթին նշված էր՝ «Թոռացեալ քեօր Վասպուրական Արծվոյն»: Դրանով լրատարը հայտնում էր իր հավատարմությունը «Արծվի Վասպուրականի» գաղափարներին: Լրատարի խմբագիրը «արծվո ճեռն էր», դարձյալ Գարեգին Մրվանձտյանցը: Մեծ դեր կատարեց «Արծվիկ Տարոնոն»՝ հայաշատ այդ վայրի առաջին տպագիր պարբերական օրգանը: Այն լույս էր տեսնում ժողովրդին հասկանալի, աշխարհաբար լեզվով, բացում նրա աչքերը, դրդում նրան պայքարել շահագործողների՝ «գայլերի ոհմակի դեմ»: «Արծվիկը» մերկացնում էր տեղական կառավարական պաշտոնյաների կամայականությունները, ժողովրդի բողոքի ձայնը հնչեցնում օսմանյան մայրաքաղաքի հայության, Ազգային ժողովի և Բ.Դռան ականջին: Լրատարը քննադատում էր նաև հայ հոգևորականության որոշ ներկայացուցիչների քսությունները, զեղծումները, ազգային հարստությունը վատնելու և գողություն անհազ կիրքը, միջոցների մեջ խտրություն չդնելու, սպանությունների և կաշառքի միջոցով դիրքի և հոգևորական բարձր աստիճանի հասնելու զագրելի գործերը:

Խրիմյանը չէր կարող իրեն կաշկանդել խմբագրի կամ ուսուցչի գործունեությամբ: Նա, իհարկե, հսկում էր և՛ տպարանի, և՛ դպրոցի աշխատանքները, բայց նրա գործունեության ոլորտը ավելի լայն էր: Նա իր առաջին գործն էր համարում «կարելի եղածին չափ տարոնեցվոց հույսը պսակել, այսինքն աղքատին իրավանց պաշտպան կենալ, օգնության հասնել տնանկին, փրկելով գիրենք կեղեքիչներուն ձեռքեն»⁶: Խրիմյանն աշխատում էր գեթ փոքր-ինչ թեթևացնել տարոնահայության վիճակը քուրդ ցեղապետերի, թուրք պաշտոնյաների, նաև հայազգի ցեղերի հարստահարություններից: Պայքարի միակ զենքը բողոքն էր, որին լծվեց Խրիմյանի ողջ խումբը. ինքը՝ հոգևոր առաջնորդն ու վանահայրը, Մուշում հաստատված քաղաքական ժողովը, «Արծվիկ Տարոնո» երկշաբաթաթերթը: Նրանք պահանջում էին բարեկարգություն, Ազգային Սահմանադրության գործադրումը գավառներում: Խրիմյանի

⁶ ԳԱԹ, Խրիմյանի ֆ., գ. 141, էջ 11:

և Մրվանձտյանցի կազմակերպած բողոքագրերը նկատելի հետք թողին տա-
րոնահայության ազգային ինքնագիտակցության զարգացման, նոր գաղա-
փարների ձևավորման վրա: Սկսվեց մի երկարատև պայքար «անիրավության
և սանձարձակ բռնության դեմ»⁷: Տարոնահայությունն ըստ արժանվույն գնա-
հատեց իր նոր հոգևոր առաջնորդին, որը համձն էր առել ամեն զոհողություն ու
հալածանք և անվարան առաջ էր տանում ժողովրդին օգնելու իր գործը: Տարո-
նահայությունն էր, որ Խրիմյանին տվեց նրա ողջ կյանքի ընթացքում ուղեկ-
ցող պատվանունը՝ Հայրիկ... Եվ իրավացի էր Երեմիա Տեկանցը, երբ գրում էր.
«Մեծագույն մասն ժողովրդյան աշխարհին ի կողմն Խրիմյանի էին, պաշտեին
և պաշտպանեին զնա և զխումբն նորա»⁸: Խրիմյանի առաջնահերթ խնդիրը
հայ գյուղացու վզին ծանրացած թաշիր (աշար) հարկի գանձման կարգա-
վորումն էր: Ըստ օրենքի, այն պետք է գանձվեր ժողովրդից նրա ստացած
բերքի և եկամտի 1/10-ի չափով: Բայց արքունի հարկահավաքները վաղուց
եղծել էին այդ օրենքը: Հարկը համարյա միշտ գանձվում էր ավելի մեծ չափով
և բնատուրքի փոխարեն դրամ էին պահանջում այն ժամանակ, երբ բերքի ար-
ժեքը մի քանի անգամ բարձրացել էր: Ծայր աստիճան հուսահատված ժո-
ղովուրդը գտնվում էր քայքայման եզրին: Կառավարական պաշտոնյաներն ու
հարկահավաքները իրենց գործունեության ընթացքում աջակցություն էին
ստանում տեղերի հոգևոր առաջնորդներից: Սակայն նորեկ հոգևոր առաջ-
նորդը մնան մերձեցման չէր գնում: Ավելին, Խրիմյանը ոչ միայն չի օժան-
դակում Բաղեշից Մուշ եկած հարկահավաք Շևքի էֆենդուն, այլև կազմակեր-
պում է գյուղապետերին՝ միասնաբար հրաժարվել թաշիրը դրամով վճարելուց:
Այդ միասնությունը շուտով քայքայվում է Խրիմյանին թշնամի խմբակցության,
Մբ. Կարապետի միաբանության և Տարոնի աղայական վերնախավի սադ-
րանքներով: Նրանցից մի քանիսը թուրք գայմագամին հաղորդում են, որ
իրենց կազմակերպողը հոգևոր առաջնորդն է: Թուրք պաշտոնյան իր մոտ է
կանչում Խրիմյանին, սպառնում, որ իրեն չօժանդակելու դեպքում բողոքագիր
կուղարկի Բ. Դռանը և հոգևոր առաջնորդին կմեղադրի պետական գանձարա-
նին վնաս հասցնելու և դավաճանության մեջ: Հարկահավաքի լրատվությամբ
Մուշ է գալիս մյութեսարիֆը, որին Մբ. Կարապետի միաբանությունը դիմավո-
րում է՝ ամբաստանելով Խրիմյանին. «Խրիմյան ունի կազմյալ ի մեջ քաղաքի
զաղտնի ժողով ընդդեմ տաճկական ժողովին, ի ռուսահայոց կասկածավորս
բերյալ բնակեցուցանե ի մեջ վանս, ժողովուրդն ապստամբության գրգռե, ար-
գելու տալ զմաքս և տասանորդ և այլ անլուր բանս...»⁹:

Մատնության լուրը լսող գյուղացիները հարձակվեցին վարդապետների
վրա, որոնք մազապուրծ փախան և թաքնվեցին իրենց խցերում: Իսկ մեծա-
հարուստ Մամիկոնյան Վարդան աղան հավաքում է «Արծվիկ Տարոնոյի»
թվերը, նրա հողվածները աչառու թարգմանությամբ, հայերեն բնագրերի հետ
միասին հանձնում թուրք պաշտոնյային՝ Խրիմյանին և նրա խմբակցությանը
ներկայացնելով իբրև քաղաքականապես անբարեհույսների: Թարգմանված
հողվածներում շեշտը դրվում էր նրանցում արտահայտված ազգային-ազա-
տագրական գաղափարների վրա, ուր Խրիմյանը ներկայացվում էր իբրև ժո-
ղովրդին ապստամբության գրգռող անձնավորություն:

⁷ Կ. Ս ա ս ո ն ի, Պատմություն Տարոնի աշխարհի, Պեյրոս, 1957, էջ 231:

⁸ Մատենադարան, ձեռագիր 4177, էջ 72:

⁹ Նույն տեղում, էջ 53:

Հակառակորդ հոգևորականները ձեռնարկում են ավելի գործուն քայլեր Խրիմյանին Տարոնից իսպառ հեռացնելու համար: Գործի է դրվում հին և փորձված միջոցը՝ մահափորձը: Դրա մասին գուժում է «Արծվիկը»¹⁰: Մահափորձը կատարվում է 1863թ. մայիսի 22-ին, ապա կրկնվում է 27-ին: Անհաջողությունից հետո քննամի վարդապետները վարձում են քուրդ ավազակի, որը Խրիմյանի տեսքից ազդված չի կարողանում կատարել պատվերը և ծունկ չոքելով նրա առաջ, խոստովանում է ամեն ինչ: Երրորդ անգամ կրկնվում է մահափորձը մայիսի 29-ին: Այդ ընթացքում Բիթլիսի մյութեսարիֆի ամբաստանությունը հասել էր Բ.Դուռ, և քուրքական արքունիքը, պատրիարքարանի միջոցով, Խրիմյանին կանչում է Կ.Պոլիս, քննելու նրան ներկայացրած մեղադրանքները: Դրանց հետևանքով 1864թ. ժամանակավորապես դադարեց «Արծվիկի» հրատարակությունը: Այդ մասին Կ.Պոլսի «Ժամանակը» գուժեց արևմտահայությանը¹¹: Ավելի քան երկու ամիս ու կես Խրիմյանը Կ.Պոլսում քակում է բազմաթիվ ազգային հաստատությունների դռներ, մինչև հաջողվում է պատրիարքին և Ազգային վարչությանը համձնել իր տեղեկագիրը: Այդ փաստաթղթով Խրիմյանը փայլուն տրամաբանությամբ արդարանում է, ինքն իր կողմից մեղադրում Բիթլիսի գայմագամին, որ ժողովրդին կեղերելով առավել մեծ հարված է հասցնում արքունի գանձարանին, քանի որ քայքայված գյուղացին դառնում էր անվճարունակ¹²:

Այդ ընթացքում պատրիարքարանը մայրաքաղաք է կանչում ընդդիմադիր վարդապետներին՝ վանական խնդիրները քննարկելու համար: Անմեղ և արդար ճանաչված հոգևոր առաջնորդն ու վանահայրը ցուցաբերում է քրիստոնեական ներողամտություն և մեծահոգաբար ներում է խոովարար վարդապետներին: Նրանք միասին վերադառնում են Տարոն: Վերսկսվում է լուսավորական հայրենամակեր գործունեությունը: «Արծվիկը» վերահրատարակվում է՝ ընդլայնելով իր թռիչքի ոլորտները, իր ձայնը հասցնելով մինչև Արևելյան Հայաստան: Մեծ գործ է կատարվում Տարոնի առաջնորդության մեջ գտնվող գյուղերում, ապա նաև վանքերում վարժարաններ բացելու ուղղությամբ: Խրիմյանի խումբը առաջ է տանում դպրոցաշինության գործը: Բացատրական աշխատանք է տարվում գյուղացիների մեջ, նշվում ուսման և կրթության անհրաժեշտությունը թե տնտեսական, թե քաղաքական նկատառումներով: Մեծ աշխատանք է ծավալվում Տարոնում Ազգային սահմանադրությունը գործադրելու ուղղությամբ, որը թույլ կտար գյուղացուն և արհեստավորին մասնակցություն ունենալ ազգային-հասարակական կյանքում: Զննադատական խոսք է ուղղվում Կ.Պոլսի Ազգային վարչության անդամների, այնտեղ ծվարած փափկակենցաղ հոգևորականության հասցեին, որոնք անտարբեր էին Հայաստանի և հայրենաբնակ ժողովրդի վիճակի նկատմամբ: Դեպի ժողովուրդը և զավառը գնալու հրավեր կոչերով Խրիմյանն իր խմբով հիշեցնում է ավելի ուշ երևան եկած նարդնիկներին. «Դեռ չտեսանք Պոլսո ձայնով ազգասեր և ոսկիով փառասեր անձինքներեն մեկ քանիսը այցելության աչքով և ոտքով պտտեին ի Հայաստան, դեռ չունին Հայաստանի վրա ուղիղ գաղափար: ...Մորթազաններ, զավառներ գնացին ձեռաց: Վարչություն, Հայաստանի մեջ մեկ հայուն կյանք չմնաց, չմնաց, չմնաց...»¹³:

¹⁰ Արծվիկ Տարոնո, 1863, №5:

¹¹ Ժամանակ, Կ.Պոլիս, 1864, №47:

¹² ԳԱԹ, Խրիմյան ֆ., գ. 141, էջ 11-17:

¹³ Արծվիկ Տարոնո, 1864:

Որոշ ժամանակ անց ընդդիմադիրները սկսում են իրենց նախկին քայքայիչ աշխատանքը: Այս անգամ նրանք կարողանում են իրագործել իրենց մտադրությունը՝ զենքի ուժով դուրս հանել Խրիմյանին վանքից: Գյուղացիությունը ոտքի կանգնեց իր Հայրիկին պաշտպանելու համար: Սկսվեց փոխադարձ հրաձգություն: Մակայն Խրիմյանն արգելեց գյուղացիներին շարունակել պայքարը և թողնելով ամեն ինչ, մեկնեց Կարին՝ այնտեղից Կ.Պոլսի կենտրոնական վարչությանը դիմումներ հղելու համար: Դա 1865թ. ամռանն էր: Այս անգամ արդեն մեկընդմիջտ փակվում են «Արծվիկ Տարոնո» երկշարաթաթերը, Սուրբ Կարապետի «Ժառանգավորացը», մյուս վանքերում բացված վարժարանները: Հաջողությամբ սկսված լուսավորական մեծ գործը ներքին և արտաքին թշնամիների հարվածների տակ ընդհատվում է:

Հակառակորդներն իրենց հաղթանակն ապահովելու համար կեղծ հանրագրեր են պատրաստում, հեռագրեր հղում Բ.Դոռ և պատրիարքարան, Խրիմյանին դարձյալ մեղադրելով պետական դավաճանության մեջ: Նրանք հեռագրում են. «Մենք՝ Մշո հայ ազգս երեք տարիե հետե կգրենք, քեզ Խրիմյան չենք ուզեր մեր մեջ, քանզի պետության անհավատարիմ և ազգին վտանգավոր մարդ է. այսքան վարդապետք վկայեցին, դարձյալ չլսեցիք. վերջապես մենք մեր ուզածն ըրինք և ինքը մեկնեցավ... վերջին ձայնիվ կբողոքենք՝ Խրիմյան չենք ուզեր»¹⁴: Հեռագիրն սպառնում էր, որ եթե պատրիարքարանը պաշտպանի Խրիմյանին, իրենք պատրաստ են Կարինում դատ վարել նրա դեմ՝ Կարնո կուսակալի և Բ.Դռան աջակցությամբ:

Ամիսներ անց պատրիարքարանը իբրև քննիչ, Տարոն՝ Մուշ և Սբ.Կարապետի վանք է ուղարկում Կարնո հոգևոր առաջնորդ Հայություն Վեհապետյանին: Զննության արդյունքները հոգուտ Խրիմյանի էին: Վեհապետյանը հաստատում է Խրիմյանի անմեղությունը, նրա հավատարմությունը սահմանադրական ոգուն, բարձր գնահատում նրա ջանքերը վանքը բարեկարգելու ուղղությամբ: Ելնելով դրանից, պատրիարքարանի հրահանգով խոտվարար վարդապետներից 6 հոգի՝ Արիստակես Դլճյանը, Խորեն Շահնազարյանը, Եսայի Դևոնդյանը, Հակոբ Գրիգորյանը, Գաբրիել Խաչատուրյանը և Կարապետ Եսայանը աքսորվում են Երուսաղեմ: Դա ծանր տպավորություն է թողնում երկու խմբակցության վրա հավասարապես: Մակայն պատրիարքարանը չի ընդունում սկզբունքային որոշում՝ Խրիմյանին իր հոգևոր պաշտոնում վերահաստատելու համար: Նա գտնում է խնդրի լուծման կոմպրոմիսային ուղի: Խրիմյանի վրա է մնում Վարագա և Սուրբ Կարապետի վանահայրությունը, իսկ Երենիա Տեկանցը նշանակվում է Տարոնի հոգևոր առաջնորդ: Խրիմյանը դեռևս մնում է Կ.Պոլսում ձեռնամուխ լինելու Տարոնում իրար հետևից կողոպտված հարուստ վանքերի՝ Հովհաննավանքի և Սիլվանա եկեղեցու կողոպտիչներին որոնելու: Նրա այդ և հետագա քայլերը նպատակամղված էին նվազեցնել տարածահայության հարստահարությունները, դիմակայել գաղթին և պանդխտությանը: «Հասավ այն վերջին կետ, որ պիտի թողու ժողովուրդ յուր բնականունը հայրենիք և տարագիր երթա օտար աշխարհներ ուր դյուր կամ հանգիստ ստանալու կհուսա»¹⁵: Խրիմյանը ստիպում էր պատրիարքին հարաբերության մեջ մտնել Բ.Դռան հետ, շահագրգռել ներքին գործոց նախարարին, որպեսզի նա իր վճռական խոսքն ասի կառավարական պաշտոնյանե-

¹⁴ ԳԱԹ, Գաբրիել Մովսեսյանցի ֆ., II բաժին, գ. 6:

¹⁵ Ամենայն հայոց Հայրիկ, Պոսթոն, 1957, էջ 152:

րին, որոնք բարենորոգումների անվան տակ մի չարագործ պաշտոնյայի փոխարինում են առավել հմուտ մի ավագակով:

Կ.Պոլսից Կարին գալով, Խրիմյանը տեղում ուսումնասիրում է թուրք պաշտոնյաների գործունեությունը և իր դիտարկումների արդյունքները տեղեկացնում պատրիարքին, որ Մշո հարստահարիչները ոչ միայն և ոչ այնքան բացահայտ գողերն ու ավագակներն են, այլ՝ նրանց գործողության մեջ դնողները, նրանց հովանավորողները, պետական պաշտոնյաները¹⁶:

Պատրիարք Պողոս Թագթագյանի հրաժարականից հետո Խրիմյանն իր դիմումներն ուղղում է պատրիարքական տեղապահ Արիստակես Ռափայելյանին և Խառն ժողովի անդամներին՝ գաղթականության դեմն առնելու համար:

Երբ Խրիմյանը Կ.Պոլսում էր, ժողովուրդը փորձով համոզվեց Խրիմյանի և նոր փոխանորդի՝ Մխիթար վարդապետի միջև եղող հսկա տարբերության վրա: Ժողովուրդը բողոքի իր ձայնն է բարձրացնում և դիմումներ հղում, արտահայտելով իր բացասական վերաբերմունքը Մխիթար վարդապետի նկատմամբ. «Որ պիտի առաջնորդե, ինքն ճամփա չգիտե, որ պիտի ուղղե, ինքն անուղիղ է, որ պիտի ուսուցանե, ինքն տգետ է, որ պիտի լուսավորե, ինքն խավար է»¹⁷: Ժողովրդի այդ բողոքի ձայնը Խրիմյանը լսելի է դարձնում Կ.Պոլսում, պահանջելով Մխիթարին հեռացնել այդ կարևոր հոգևոր պաշտոնից, նրա փոխարեն Մուշ ուղարկել ժողովրդանվեր մի գործչի: 1868թ. սեպտեմբերին Խրիմյանը Երեմիա Տեկանցիի հետ մեկնում է Էջմիածին եպիսկոպոս ձեռնադրվելու: Դա նրա երրորդ ճանապարհորդությունն էր Արևելյան Հայաստան: Նրա ցանկությունը ոչ այնքան եպիսկոպոս ձեռնադրվելն էր, որքան կրկին անգամ լինել Արևելյան Հայաստանում, հարաբերություններ հաստատել արևելահայ գործիչների հետ, մտքեր փոխանակել իրենց հուզող խնդիրների շուրջ¹⁸: Սակայն կաթողիկոսը ի չիք դարձրեց նրա ձգտումը: Երբ Խրիմյանը եպիսկոպոս է ձեռնադրվում «ի վերա տանն Տարոնո», իսկ Տեկանցը՝ Խարբերդի վիճակի վրա, Գևորգ Դ-ն ստիպում է նրանց անմիջապես հետ վերադառնալ իրենց թեմերը, զրկելով Էջմիածնից բացի այլ վայրերում լինելու հնարավորությունից:

Արդեն ձմեռ էր, երբ նրանք հասան Կարին. այն ժամանակվա երթևեկության պայմաններում Տարոն ուղևորվելը համարյա անհնարին էր: Բայց Խրիմյանը Կարինում գուր ժամանակ չի վատնում: Նա սպասում էր նոր վալիի գալույթին, որպեսզի որոշ քայլեր ձեռնարկի տարոնահայության հարկային բեռը թեթևացնելու համար: Այդ նպատակով մա հրահանգում է Տարոնում գտնվող Գարեգին Սրվանձտյանցին՝ շուտափույթ Կարին ուղարկել «Մշո աշխարհին վերաբերյալ ամեն թուղթերը, խնդիրները, մազապաթաները, ինչ որ կա», նոր նահանգապետին ներկայացնելու, «դարման ու դատաստան պահանջելու»¹⁹: Իսկ Երեմիա Տեկանցն արձանագրում է. «Ուստի գրեցաք Գարեգին վարդապետի գրել ընդարձակ տեղեկագիր հարստահարության և առաքել առ մեզ, զի մատուցուք առ կուսակալն և խնդրեցաք ի նմանե դարման աղետաբեր չարյաց»²⁰: Սրվանձտյանցը բարեխղճությամբ կատարում է իրեն տված հանձնարարությունը, գրում է մի ծավալուն տեղեկագիր, ուղար-

¹⁶ Նույն տեղում, էջ 157:

¹⁷ Նույն տեղում, էջ 152–153:

¹⁸ ԳԱԹ, Խրիմյանի ֆ., գ. 4:

¹⁹ ԳԱԹ, Սրվանձտյանցի ֆ., II քաժիմ, գ. 391:

²⁰ Մատենադարան, ձեռագիր 4179, էջ 51:

կում ուսուցչին, իր կողմից խնդրելով հրատարակել տալ Կ. Պոլսի «Մանգումեն-ի էֆքյար» («Մտքերի շարք») հայատառ թուրքերեն լրագրում: «Մանգումեն» հրատարակում է այդ տեղեկագիրը ծավալուն հոդվածաշարով՝ «Մշեցվոց վրա ընդհանուր տեսություն մը» խորագրով²¹: Այն մեծ ազդեցություն գործեց պոլսահայության և օսմանյան կառավարող շրջաններում²²: Վեզիր Ալի փաշան քարգմանել է տալիս հոդվածը թուրքերեն, առաքում Կարնո կուսակալին, որպեսզի վերջինս տեղեկություն հաղորդի նրա հավաստիության մասին: Կուսակալն ստիպված պատասխանում է, որ հոդվածաշարի բովանդակությունը համապատասխանում է իրականությանը, իսկ հարստահարությունների ցուցակը նույնիսկ թերի է: Պատասխանից անմիջապես հետո մեծ վեզիր Ալի փաշան հրաման է հղում Կարնո կուսակալ Իսմայիլ փաշային՝ անհապաղ գտնել ու բանտարկել Հովհաննավանքի կողոպտիչներին, անձամբ այցելել Սշո մյութեսարիֆություն, կալանավորել Հասնանցի և Ջիբրանցի թռույններին ու մյուս ոճրագործներին: Իբրև քննիչ Մուշ են մեկնում Օսման պեյն ու Ազգային ժողովի անդամ Խորաճանյան Դանիել էֆենդին: Թուրք քննիչը, քողարկելով Սշո մեջլիսի անդամների չարաշահումները, բոլոր հարստահարությունները բարդում է քրդերի վրա: Այդ տեղեկատվության հիման վրա աքսոր են ուղարկվում քուրդ ազդեցիկ 70 աղաներ: Ալի փաշայի նման գործելակերպը հետապնդում էր եվրոպական դեսպանների աչքին արդարության ջատագով երևալու նպատակ: Փաստորեն, Խրիմյանը և իր սանը կարողանում են Կ. Պոլսի Ազգային ժողովի և թուրքական արքունիքի ուշադրությունը հրավիրել Տարնի վրա, ստիպել նրանց ձեռնարկել բարենորոգչական ինչ-որ քայլեր: Մակայն Խրիմյանը և արևմտահայ մյուս գործիչները համոզվում են, որ քրդերը գործիք են պետական պաշտոնյաների ձեռքին և հայերը գուր հույսեր են կապում Բ. Դռան հետ²³:

Խրիմյանն իր ուշադրությունը բևեռում է նաև մի այլ կարևոր խնդրի կարգավորման վրա: Դա հայոց վանքերը հարկերից ազատելու պարագան էր: Կ. Պոլսի պատրիարքական տեղապահին ուղղած իր մամակներում Խրիմյանը փաստարկներով ապացուցում է, որ Օսմանյան կայսրության հաստատումից ի վեր, թուրքական սուլթանները հատուկ ֆերմաններով հավաստել են բոլոր ազգերի հոգևոր հաստատությունների հարկերից ազատ լինելը: Այդ իրավունքը առավել ևս պետք է շեշտվեր Թանգիմաթի արտոնած հավասարության կարգախոսներով: Մակայն ժամանակի ընթացքում հայոց վանքերի մեծ մասը դարձել են հարկատու: Խրիմյանն անհրաժեշտ է համարում հետամտել և նորից վերականգնել նախկին իրավունքները. «Իրավունքը ինքնին կմեռնի, եթե իրավանգ տերերը բարձիթողի ընելով լռեն միշտ»²⁴:

Չնայած Խրիմյանի դրդումներին և պատրիարքական տեղապահի դիմումներին, հայ առաքելական եկեղեցու հոգևոր հաստատությունները կորցրին իրենց արտոնությունները: Մակայն Խրիմյանը շարունակեց իր պայքարն այդ ուղղությամբ 70-ական թվականներին ևս, երբ ինքը բարձրացավ Կ. Պոլսի հայոց պատրիարքի գահին:

Նորընծա եպիսկոպոսի ամենակարևոր գործը Կարնո մահանգապետին ուղղած դիմումն էր, որի մեջ կային գործուն առաջարկություններ տարո-

²¹ Մանգումենի էֆքյար, 1869, № 892, 895, 898, 902, 918, 921, 923:

²² Է. Կոստանդյան, Գարեգին Սրվանձտյանց, Ե., 1979, էջ 98:

²³ Մատենադարան, ձեռագիր 4179, էջ 75:

²⁴ Ամենայն հայոց հայրիկ, էջ 167:

նահայության կյանքը բարելավելու ուղիների մասին: Այդ փաստաթուղթը մեզ է հասել Գյուտ Աղանյանցի հրատարակած «Դիվանի» ԺԳ հատորից: Հրատարակիչը այն վերնագրել է «Խրիմյան Հայրիկի բողոքագիրը Մշո հայ ժողովրդի հարստահարությունների նկարագրով»²⁵: Հրատարակիչը ծանոթագրություններում նշում է, որ բողոքագիրը թվական չունի: Հետազոտությունների ընթացքում պարզեցինք գրության ճշգրիտ թվականը, նույնիսկ ամիսը: Դա հնարավոր դարձավ՝ համեմատելով Խրիմյանի նամակները Տեկանցի «Տոհմային հիշատակարանների» հատորի բովանդակության հետ²⁶: Բողոքագիրը Կարնո կուսակալին է մատուցվել 1869թ. հունվար ամսին: Այդ նամակն Խրիմյանը հաղորդում է Կ.Պոլսի պատրիարքական տեղապահ Արիստակես եպիսկոպոս Ռաֆայելյանին²⁷:

60-ական թվականներին Խրիմյանը և իր զինակիցները կարծում էին, թե Բ.Դ-նանը և պատրիարքարանին ուղղած բողոքները, տեղեկագրերը և բարենորոգման ծրագրերը կարող են ունենալ դրական հետևանքներ, որովհետև պատրիարքարանի միջնորդությամբ կառավարությունը կարող է փոխել իրենց պաշտոնը չարաշահող վալիներին, մյութեսարիֆներին, մյուդիրներին և այլոց: Սակայն եթե նույնիսկ չլինեին ակնկալիքներ կենտրոնական կառավարության նկատմամբ, անհրաժեշտ էր բողոքել ու դրդել, որպեսզի ժողովուրդը անմոռոչ չհնազանդվի իշխողի և ուժեղի կամքին: Խրիմյանը բողոքում է, որ «Մշո երկրի պես շահութաբեր ու արդյունավետ երկիրը, որը կարող է լցնել պետական գանձարանը իր առատ հարկերով, հարստահարությունների պատճառով չկանրա մնան «թշվառ, լսեղճ, բարձիթողի եղած երկիր»: Կառավարության բարենորոգումների ծրագիրը մնացել է թղթի վրա, եզրակացնում է Խրիմյանը և հայտարարում, որ Տարոնում գոյություն չունի «ոչ տերության աչք, ոչ օրինաց աչք և ոչ ևս հավատարիմ պաշտոնեից աչքը»: Խրիմյանը բարձր է գնահատում ժողովրդի, մասնավորապես գյուղացիության վաստակը²⁸: Այդ պատճառով էլ իր պարտքն է համարում պաշտպանել նրան, գյուղացիությանը, մատնանշել այն «աղբյուրները», որոնք պատճառ են դառնում գյուղացիության ունեզրկմանն ու քայքայմանը, երկիրն ամայացնող ավերիչ գաղթին:

Հարստահարությունների առաջին աղբյուրը նա համարում է Հայաստանում բնակություն հաստատած քրդական ցեղերի, մասնավորապես Հասնանցի և Ջիբրանցի ցեղերի ցեղապետներին, որոնք իրականացնում էին Մշո փաստական իշխանությունը, պաշտպանություն էին գտնում պետական պաշտոնյաների կողմից, նրանց հետ կիսում ժողովրդից հափշտակածները²⁹: Ուշագրավ է մի հանգամանք. Խրիմյանը հարստահարությունների աղբյուրը համարում է ցեղապետներին, ոչ թե քուրդ ռայային, որոնք հայ գյուղացու մնան «խրրկ գերի և ծառա են թողուններուն ձեռք»: Դա ընդգծում է Խրիմյանի ժողովրդավարական մոտեցումը, նա նույն «կանգուն»-ներով է չափում երկու ազգերի շահագործողներին մի կողմից և հարստահարվող գյուղացիությանը մյուս կողմից: Այդ չափիքը վերացնելու համար Խրիմյանն առաջարկում էր արքային «ամենագորեղ առաջնորդներին, կտրել իրենց զինական ուժից, իսկ հասարակ

²⁵ Դիվան հայոց պատմության, հ. ԺԳ, Թիֆլիս, 1915, էջ 462-470:

²⁶ Մատենադարան, ձեռագիր 4179, Ամենայն հայոց Հայրիկ, էջ 154/29 հունվարի, 1869թ. նամակը: Այս հայտնաբերեցինք բողոքագրի բնագիրը ԳԱԹ-ի Գ.Սրվանձատյանցի ֆոնդի V քաժնի 4 գործում:

²⁷ Ամենայն հայոց Հայրիկ, էջ 154:

²⁸ Դիվան..., էջ 464:

²⁹ Նույն տեղում, էջ 465:

ծողովրդին «տեգին տեղ մաճ տալով կրթել զիրենք շինական աշխատության մեջ»³⁰։ Հարստահարությունների երկրորդ աղբյուրը պետության տասանորդ հարկի վարձակալներն են, որոնք բազմաթիվ օրինախախտումներ են կատարում հարկը հավաքելու ժամանակ։ Յուրաքանչյուր բերքի տեսակից իր ժամանակին հարկը վերցնելու փոխարեն, հարկահավաքը չափում է բերքը, բայց գանձումը հետաձգում մինչև ձմռան սկիզբը, երբ բերքի տվյալ տեսակը կրկնապատիկ կամ նույնիսկ եռապատիկ թանկացել է։ Այդ ժամանակ հարկահավաքը բերքի փոխարեն դրամ է պահանջում եռապատիկ թանկ գներով։ Դա գյուղացուն հասցնում է ունեզրկման և քայքայման։ Նա չի կարող որևէ տեղ բողոքել, քանի որ տասանորդի հարկը վարձակալողը Մշո կառավարության անդամներից որևէ մեկն է։ Հարստահարության երրորդ աղբյուրը երկրից գաղթած, հեռացած անձնավորությունների տուրքը մնացողներից գանձելու՝ օրենքի ուժ ստացած վաղեմի սովորույթն է։ Կում գյուղեր, որոնք առաջներում եղել են բարգավաճ և բազմամարդ։ Կյանքի անողորմ հարվածների տակ գյուղացին թողել է իր տունն ու տեղը, իր հայրենի երկիրը և գաղթել այլ վայրեր։ Տեղում մնացած բնակչությունը ճնշվում է գաղթածների հարկերի ծանրությունից։

Խրիմյանը պահանջում էր վիճակագրական հաշվումներով վճռել այդ խնդիրները և գյուղացուն ազատել տառապանքից։ «...Ողորմելի գեղացիները գնացող գաղթականաց ծանր ծանր բեռանց տակ կճնշվեն, մինչդեռ իրենք չքավորություն են իրենց բաժին տուրքը կարող չեն վճարել, ինչպես կարելի է և ինչ իրավունք է ուրիշի բաժին ինկած տուրքն ևս վճարել»³¹։

Տարոնի հոգևոր առաջնորդի համարձակությունը հասնում է այն աստիճանի, որ գործելով Մուշում, առանց երկնչելու, բացահայտ և բացարձակ մատնանշում է Մշո մեջլիսի գործած չարիքներն ու հարստահարությունները և դրանց ամենամեծ աղբյուրը համարում նրա վատթար վարչության գործունեությունը։ Այդ պետական աստիճանավորներին Խրիմյանը համեմատում է ապստամբ քուրդ ցեղապետերի հետ, որոնք իրենց անսանձ, անգուսպ և կատաղի բարքերով ավերում էին երկիրը, ոտքի կոխան դարձնում, անարգել սրի քաշում ժողովրդին, իրենց պատասխանատու չհամարելով պետական ոչ մի մարմնի, անգամ Բ.Դռան առջև։ Ահա Խրիմյանի առաջարկության հիմնական բովանդակությունը. «Մշո երկրի մեջ հիմնական բարեկարգություն հաստատելու համար անշուշտ արմատեն կամ նույնիսկ գլխեն սկսելու է, և այս գլուխ և արմատը նույնիսկ Մշո կառավարությունն է յուր ամեն հանգամանք»³²։ Եվ որպեսզի չկասկածեն, թե հոգևոր առաջնորդը հոգում է միայն քրիստոնյա բնակչության կարիքները, Խրիմյանը մատնանշում է, որ «իբրև մարդ և մարդկային կարեկցությամբ նույն աչքով նկատեցինք նաև իսլամ ժողովրդոց խեղճ և աղքատ վիճակը, որոնցմե շատերը ավուր պարենի անգամ կարող ըլլալով կը տառապին չարաչար»։

Կարինի նոր նահանգապետին հանձնելով այդ բողոքագիրը, Խրիմյանը թերահավատ էր նրա կարողությունների և ցանկությունների նկատմամբ, սակայն բողոքում էր, որովհետև նրա բնավորությանն անհարիր էին հյուսիս-գանդությունը չարին և բռնավորին, որովհետև իր առաջ խնդիր էր դրել

³⁰ Նման կարծիք էր արտահայտում նաև Գ.Սրվանձտյանցը «Մշեցվոց վրա ընդհանուր տեսություն մը» հոդվածաշարում. պատժել քուրդ ռազմական ավազանուն, իսկ նրանց ծառաներին դարձնել մատակյաց, վարժեցնել երկրագործության։

³¹ Դիվան..., էջ 468։

³² Նույն տեղում, էջ 469։

բարձրացնել ժողովրդի ազգային գիտակցության զգացումը, մղել նրան դեպի սոցիալական պահանջներ:

1869թ. ողջ ձմեռը Խրիմյանը մնաց Կարինում, իսկ հունիսին արդեն Տարոնում էր և վարում էր Սուրբ Կարապետի վանքի վանահայրությունը: Տեղում նա ձեռնամուխ է լինում վանական բարեփոխումների իրականացմանը: Վանքապատկան հողատարածություններում երկրագործությանը զարկ տալու նպատակով մի հմուտ մասնագետ նշանակվում է երկրագործության տեսուչ:

Տարոնում ևս Խրիմյանը չի դադարում հանդիպումները օսմանյան պաշտոնյաների հետ: Նահանգապետի հետ Կարինում ունեցած տեսակցության արդյունքն այն է լինում, որ վերջինս Խրիմյանի հրավերով գալիս է Տարոն: Խորաճանյան Դանիել էֆենդու և մի քանի վարդապետների ուղեկցությամբ Խրիմյանն ընդառաջ է գնում նրան մինչև Մատրավանք: Վալյան նրա խնդրանքով ընդունում է Մշո դաշտի գյուղապետերին, գրույց ունենում, հուսադրում, որ կօգնի հարստահարություններին դարման դրնելու խնդրում: Սրամիտ Խրիմյանը այդ մասին նամակում գրում է. «Ճառին տեղն էր Եվրասի եզերք: Աստված տա, որ այս հուսալի ճառին ձայն ջրին ձայն չըլլա»³³: Բոլոր դեպքերում Տարոնի Հայրիկը մտածում էր, որ անհրաժեշտ է լսրախոսել նոր նահանգապետի այդ քայլերը և հանձնարարում էր Կարինում գտնվող Գարեգին Սրվանձտյանցին գովաբանական հոդված գրել և ուղարկել «Մանգումե-ի էֆեյարին»:

Կարճ է տևում խաղաղ աշխատանքը: Քիչ ժամանակ անց դարձյալ գլուխ են բարձրացնում հետադիմական ուժերը: Դեռևս տասնամյակի սկզբին Խրիմյանին դավող գյուղապետերը նորից միավորվում են վանքի միաբանների հակախրիմյանական խմբին և միասնական ուժերով պայքար ծավալում ժողովրդի հաշվին իրենց շահույթներն ապահովելու համար: Վերստին գործի են դրվում Խրիմյանին վարկաբեկելու հին ձևերը՝ կեղծ հանրագիր-հեռագրերը: Խրիմյանը երկար է խորհում Մխիթար վարդապետին և գյուղապետերին հակահարված տալու ուղիների մասին: Մակայն հաղթում են քրիստոնեական ներողամտությունն ու խոհեմությունը: Նա չի ցանկանում թուրքական պաշտոնյայի միջոցով հարված հասցնել հայ վարդապետին: «Մխիթար վարդապետը այս վերջի հեղափոխության մեջ պարագլուխ կայնելով պիտի հուզե որչափ ուժ ունի: Շատ կմտածիմ այս կետին վրա, եթե թողում այնպես և համբերեմ, նա իր չարությունը հառաջ մղելու է անձանձի կերպով, իսկ եթե քաղաքականության ձեռքով Մշո երկրեն դուրս հանելու ձեռնարկություն ընեմ, այդ միջոցն իրենց սեփական միջոցն է, գոր չեմ ուզեր ի գործ դնել: Ուստի պիտի թողում դարձյալ, որ չարությունը յուր ասպարեզը բանա, հավատալով, թե ճշմարտությունը պիտի հաղթե»³⁴: Նման վարվելակերպով նա ապացուցում է, որ իսկապես Քրիստոսի մկիրյալ պաշտոնյա է՝ ազնիվ և ներողամիտ:

Այդ գործողության համար նահանգապետ վաշան բանտարկում է մի քանի տեղացի քուրդ և թուրք աղաների, իսկ դավադիր գյուղապետերին դիտողություն է անում, ապա մեղանցից մի խումբ կանչվում է Կարին՝ պատասխան տալու: Նույնիսկ նման պարագաներում Խրիմյանը տազմապում է: Նա անազանգում է Կարինում գտնվող Գ.Սրվանձտյանցին, որպեսզի վերջինս տեղեկություններ հավաքի, անհրաժեշտության դեպքում օգնության հասնի Կարին կանչված հայ գյուղապետերին և վարդապետներին: Հրահանգներ

³³ ԳԱԹ, Գ.Սրվանձտյանցի ֆ., II քաժին, գ. 404:

³⁴ Նույն տեղում, գ. 410:

տալու հետ մեկտեղ Խրիմյանն իր վիշտն է արտահայտում իր ազգակիցների ազգակործան ընթացքի համար. «Այդ մարդիկ ազգայինի նկատմամբ միշտ հանցավոր են: Դոքա ամբողջ Մշո երկրին, Սուրբ Կարապետի վանուց մեծամեծ վնասներ հասուցին. դոքա շատ անգամ բարիքներ տեսան և դարձյալ ապերախտեցին ամեն կերպով. մենք իրենց դեմ անհիշաչարությամբ վարվեցանք, այլ իրենք չզգաստացան»³⁵: Ամառվա ամիսներն անցան տագնապներով. Խրիմյանը դեգերում էր Մուշից Կարին, Կարինից Մուշ՝ արդարության, հաղթանակի, բայց և ազգակից վարդապետներին վնաս չհասցնելու նպատակով: Սեպտեմբեր ամսին Կ.Պոլսից լուր ստացվեց, որ Սկտիչ Խրիմյանը Կ.Պոլսի Ազգային ժողովում ընտրվել է հայոց պատրիարք:

Բարոյական չափանիշներով արդյունավետ եղավ Խրիմյանի գործունեության տարոնյան շրջանը: Այստեղ նա արժանացավ Հայրիկ պատվանունին: Վասպուրականում և Տարոնում ծավալած ժողովրդանպաստ գործունեության գնահատականը եղավ Կ.Պոլսի պատրիարքի պատվավոր ֆերմին բարձրանալը:

ДУХОВНЫЙ ПРЕДВОДИТЕЛЬ ТАРОНА

Э.А.КОСТАНДЯН

Р е з ю м е

Решением Константинопольского национального собрания настоятель Варагского монастыря Мкртыч Хримян в 1862г. был назначен епархиальным начальником Тарона и настоятелем монастыря Святого Карапета. Монастырская братия недружелюбно приняла Хримяна и его соратника Г. Срвандзтянца. Богатство этого монастыря служило не национальным целям, а группе мирских и духовных феодалов, а также курдским деревбоям и турецким должностным лицам. С назначением Хримяна настоятелем картина резко изменилась. Был создан хозяйственный совет, контролирующий средства монастыря. Началась длительная борьба между сторонниками Хримяна и главными членами братии. На сбереженные средства было основано духовное училище в монастыре Св.Карапета “Жарангаворац”, главным учителем которого был Г.Срвандзтянец. В 1863г. был основан и создан двухнедельник “Орленок Тарона”. Редактором газеты был Г.Срвандзтянец. Хримян, стремясь облегчить материальное положение народа, вступил в борьбу с турецкими чиновниками, взимавшими с народа непомерные налоги. Таронцы своего защитника называли почетным титулом — Айрик.

В сентябре 1869г. Хримян был избран константинопольским патриархом.

³⁵ ԳԱԹ, Գ.Մրվանճտյանցի ֆ., II քաժին, գ. 415: